



Կարգապահական գործ թիվ ԿԳ-16183

Հայաստանի Հանրապետության փաստաբանների պալատի խորհրդի
2016 թվականի դեկտեմբերի 19-ի թիվ 313-րդ նիստի

Ո Ր Ո Շ ՈՒ Մ ԹԻՎ ԿԳ/196-Ա

**ՓԱՍՏԱԲԱՆ ԷԴԻԹ ԽԱՉԱՏՈՒՐՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԵԼՈՒ ՄԱՍԻՆ**
(ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Կարեն Սարգսյանի, Խորհրդի անդամներ՝ Նելլի Հարությունյանի, Տիգրան Խուրշուդյանի, Կարապետ Աղաջանյանի, Մելանյա Առուստամյանի, Սիմոն Բաբայանի, կազմով, քարտուղարությամբ Նոննա Համբարձումյանի, քննության առնելով փաստաբան Էդիթ Խաչատուրյանին (արտոնագիր թիվ 435) կարգապահական պատասխանատվության ենթարկելու վերաբերյալ հարցը՝

Պ Ա Ր Ձ Ե Ց

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (այսուհետ՝ Դպրոց) կողմից 01.08.2016թ-ին ներկայացված տեղեկանքի համաձայն՝ փաստաբան Էդիթ Խաչատուրյանը (արտոնագիր թիվ 435) 2016թ-ի առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի առաջին տեղակալի 08.08.2016թ-ի թիվ 346-Ա/ԿԳ-16183 որոշմամբ կարգապահական վարույթ է հարուցվել փաստաբան Էդիթ Խաչատուրյանի նկատմամբ՝ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրի (**այսուհետ՝ Կանոնագիր**) 2.8.2 կետի խախտման հատկանիշներով:

08.08.2016թ-ին կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2016 թվականի դեկտեմբերի 19-ին, ժամը՝ 18:30-ին, ՀՀ փաստաբանների պալատի վարչական շենքում (ք.Երևան, Զաքիյան 2, 4-րդ հարկ, թիվ 12 սենյակ):

3. Պատասխանողի համառոտ բացատրությունը.

Փաստաբան Էդիթ Խաչատուրյանը 16.08.2016թ. գրավոր դիմումով հայտնել է, որ 2010 թվականից բնակվում է արտերկրում և ՀՀ է այցելում կարճ ժամանակով: Խնդրել է կարգապահական վարույթը կարճել «Փաստաբանների վերապատրաստման» կարգի 30²-րդ կետով:

Դիմումին կից ներկայացրել է իր անձնագրի՝ Հայաստան մուտք գործելու համապատասխան էջերի պատճեն:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) 2016թ. առաջին կիսամյակի (հունվար-հունիս (ներառյալ)) ընթացքում Պալատի, Դպրոցի և Պալատի կողմից սահմանված կարգով հավաքարմագրված կազմակերպությունների կողմից հեռավար վերապատրաստում չի կազմակերպվել:

Նշված փաստը հաստատվում է Պալատի վերապատրաստման հարցերով համակարգողի 10.10.2016թ. տեղեկանքով:

2) Փաստաբան Էդիթ Խաչատուրյանը 2016թ. հունվար-հունիս (ներառյալ) ամիսներին չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

Նշված փաստը հաստատվում է Դպրոցի 01.08.2016թ. տեղեկանքով, Պատասխանողի դիմումով:

3) Փաստաբան Էդիթ Խաչատուրյանի նկատմամբ սահմանված կարգով և ժամաքանակով վերապատրաստման դասընթացներին չմասնակցելու հիմքով կարգապահական վարույթ հարուցվել է առաջին անգամ:

Նշված փաստը հաստատվում է Պալատի ընդհանուր դեպարտամենտի ղեկավարի կողմից 10.10.2016թ. տրամադրված N ԸԴՂ/ԿԳ/910-16 տեղեկանքով:

4) Փաստաբան Էդիթ Խաչատուրյանը հաշվետու ժամանակահատվածում բացակայել է Հայաստանի Հանրապետությունից:

Նշված փաստը հաստատվում է Էդիթ Խաչատուրյանի կողմից 16.08.2016թ. ներկայացված դիմումով և դրան կից ներկայացված անձնագրի պատճենով:

5. Պատասխանողի անձր բնութագրող հանգամանքները.

Պալատի ընդհանուր դեպարտամենտի ղեկավարի կողմից 10.10.2016թ. տրամադրված տեղեկանքի համաձայն՝ փաստաբան Էդիթ Խաչատուրյանի (արտոնագիր 435, ստացել է՝ 24.06.2005թ.) նկատմամբ 2006-2016թթ. ընկած

ժամանակահատվածում վերապատրաստման դասընթացներին չմասնակցելու հիմքով կարգապահական վարույթ չի հարուցվել (չհաշված Պալատի նախագահի առաջին տեղակալի 08.08.2016թ. թիվ 346-Ա/ԿԳ-16183 որոշմամբ հարուցված կարգապահական գործի):

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Էդիթ Խաչատրյանի նկատմամբ կարգապահական գործի վարույթը ենթակա է կարճման՝ հետևյալ պատճառաբանությամբ.

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի, Հայաստանի Հանրապետության փաստաբանների պալատի կանոնադրության, Փաստաբանի վարքագծի կանոնագրքի և Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի (այսուհետ՝ **Կարգ**) դրույթներով:

«Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի համաձայն՝ փաստաբանը պարտավոր է՝ ... 4.1) սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:

«Փաստաբանության մասին» ՀՀ օրենքի 45.12-րդ հոդվածի 2-րդ մասի համաձայն՝ փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել:

Հայաստանի Հանրապետության փաստաբանների պալատի կանոնադրության 16.5 կետի 24-րդ ենթակետի համաձայն՝ Պալատի խորհուրդը, որպես գործադիր մարմին հաստատում է փաստաբանների վերապատրաստման կարգը:

Կանոնագրքի 2.8.2 ենթակետը սահմանում է, որ փաստաբանը պարտավոր է Պալատի խորհրդի կողմից սահմանված կարգով և ժամաքանակով մասնակցել Օրենքով նախատեսված վերապատրաստման դասընթացներին:

Կարգի 1-ին կետի համաձայն՝ կարգը սահմանում է փաստաբանների վերապատրաստման դասընթացներ անցնելու ընթացակարգը, ժամկետները, ժամերի հաշվարկը, պատասխանատվության, հաշվետվողականության, ինչպես նաև վերապատրաստման հետ կապված այլ հարաբերությունները:

Կարգի 8-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը՝ Կարգով նախատեսված ժամկետում և ընթացակարգով, պետք է անցնի 12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) վերապատրաստում: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):

Կարգի 27-րդ կետի համաձայն՝ կարգը խախտելու համար փաստաբանը ենթակա

է կարգապահական պատասխանատվության՝ «Փաստաբանության մասին» Հայաստանի Հանրապետության օրենքով և Փաստաբանի վարքագծի կանոնագրքով սահմանված կարգով:

Պալատի խորհրդի՝ «ՀՀ փաստաբանների պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգում լրացումներ կատարելու հարցը քննարկելու մասին» 29.10.2015թ. թիվ 28/8-Լ որոշմամբ (**այսուհետ՝ Որոշում**)՝ Կարգը լրացվել է 30.² կետով, համաձայն որի՝ վերապատրաստման դասընթաց չանցնելու հիմքով փաստաբանի նկատմամբ առաջին անգամ հարուցված կարգապահական վարույթը ենթակա է կարճման, եթե փաստաբանը գրավոր դիմում (այդ թվում՝ էլեկտրոնային փոստի միջոցով) է ներկայացնում Պալատի խորհրդին՝ ապացուցելով, որ գտնվել է արտերկրում, բացառությամբ, այն դեպքի, երբ փաստաբանի համար գործում է հեռավար վերապատրաստման հնարավորություն:

Սահմանված ժամկետում վերապատրաստման դասընթացներին չմասնակցելու համար փաստաբանը ենթակա է պատասխանատվության, բացառությամբ Կարգի 30.² և 30.³ կետերով սահմանված դեպքերի, որոնց կիրառման համար անհրաժեշտ է հետևյալ պայմանների պարտադիր առկայությունը՝

- ✓ վերապատրաստման դասընթաց չանցնելու հիմքով փաստաբանի նկատմամբ կարգապահական վարույթը պետք է հարուցված լինի առաջին անգամ,
- ✓ վերապատրաստման դասընթաց չանցնելու հիմքով փաստաբանի նկատմամբ կարգապահական վարույթը պետք է հարուցված լինի 2015 թվականի հունվարի 1-ից հետո,
- ✓ կարգով սահմանված արտոնությունից փաստաբանը կարող է օգտվել միայն մեկ անգամ,
- ✓ փաստաբանը պետք է գրավոր դիմում (այդ թվում՝ էլեկտրոնային փոստի միջոցով) ներկայացնի Պալատին՝ ապացուցելով, որ գտնվել է արտերկրում:

Փաստաբան Էդիթ Խաչատուրյանի նկատմամբ սույն կարգապահական վարույթը հարուցվել է այն հիմքով, որ վերջինս՝ խախտելով Կարգի վերոնշյալ կանոնը, 2016թ. առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին:

5) Պալատի խորհուրդն արձանագրում է, որ 2016 թվականի հունվար-հունիս (ներառյալ) ամիսներին Պալատը հեռավար վերապատրաստում չի կազմակերպել:

Նման պայմաններում Պալատի խորհուրդն արձանագրում է, որ փաստաբան Էդիթ Խաչատուրյանն օբյեկտիվորեն հնարավորություն չի ունեցել հաշվետու ժամանակահատվածում անցնելու տվյալ կիսամյակի համար պարտադիր 12 (տասներկու) ակադեմիական ժամ ժամաքանակով վերապատրաստման դասընթացները:

Պալատի ընդհանուր դեպարտամենտի ղեկավարի կողմից 10.10.2016թ. տրամադրված տեղեկանքից բխում է, որ Կարգի վերոնշյալ լրացումը կատարելուց հետո փաստաբան Էդիթ Խաչատուրյանի նկատմամբ վերապատրաստման դասընթացներին

չմասնակցելու հիմքով կարգապահական վարույթ հարուցվել է առաջին անգամ:

Կարգում վերոնշյալ լրացումը կատարելուց հետո, **փաստաբան Էդիթ Խաչատուրյանը 16.08.2016թ. գրավոր դիմումով հայտնել է, որ գտնվում է արտերկրում և ի ապացույց դրան ներկայացրել անձնագրի՝ համապատասխան էջերի պատճեն:**

Նման պայմաններում, Պալատի խորհուրդը, հաշվի առնելով Էդիթ Խաչատուրյանի դիմումը՝ գտնում է, որ Կարգի 30.² կետով սահմանված արտոնությունը կիրառելի է նաև փաստաբան Էդիթ Խաչատուրյանի նկատմամբ, իսկ «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Կանոնագրքի 2.8.2 ենթակետի խախտման հատկանիշներով հարուցված սույն կարգապահական վարույթը ենթակա է կարճման:

Միաժամանակ՝ Պալատի խորհուրդը հարկ է համարում փաստաբան Էդիթ Խաչատուրյանի ուշադրությունը հրավիրել այն հանգամանքի վրա, որ Կարգի 30.³ կետի համաձայն՝ սույն Կարգի 30.² կետով սահմանված արտոնությունից փաստաբանը կարող է օգտվել միայն մեկ անգամ:

Ելնելով վերոգրյալից, Պալատի խորհուրդը՝ ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39.7-րդ հոդվածի 5-րդ մասի 2-րդ կետի, 39.8-րդ հոդվածի 1-ին մասի 1-ին կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, «Փաստաբանի նկատմամբ կարգապահական վարույթի իրականացման» կարգի 28-րդ 1-ին մասի 1-ին կետի, 30-րդ հոդվածի 5-րդ մասի 2-րդ կետի պահանջներով, Կարգի 30.² և 30.³ կետերի, ինչպես նաև Որոշման պահանջներով՝

Ո Ր Ո Շ Ե Ց

1. Փաստաբան Էդիթ Խաչատուրյանին (արտոնագիր 435) նկատմամբ 08.08.2016թ. հարուցված թիվ 346-Ա/ԿԳ-16183 կարգապահական գործի վարույթը կարճել՝ փաստաբանի նկատմամբ Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի 30.² կետով սահմանված արտոնությունը կիրառելու հիմքով:

2. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Էդիթ Խաչատուրյանին:

Ծանոթություն. Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:

ՀՀ փաստաբանների պալատի խորհրդի
կարգապահական գործով
նիստը նախագահող՝

Կարեն Սարգսյան